



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 3 Yangia anidakangma : [Tir Yimyim](#) [tiryimyim@aolima](#)

[tir yimyim](#) TAPAK 7

Bhajan Lal Sharma Rajasthan
chief minister kümogo

Pakistan court-i Nawaz
Sharif medentsüogo

VOL. XXI NO. 66 (ADOK 66) DIMAPUR RASEMNÜ (WEDNESDAY)

LUCHII (DECEMBER) 13, 2023

₹ 5.00

NCSU-i Kohima nung Best Traffic personnel tushir

Nagaland nung aluyimba maparen tuluba inyaktettsü

Kohima, December 12, 2023 (TYO): Mongulbarnü Hotel Japfu Kohima nung Nagaland Contractors' and Suppliers' Union (NCSU)-i Advent Christmas cum felicitation of Best Traffic Award 2023 sentong ayonga agiogo.

Iba sentong nung Benthunglo Tungoe, WPC North Traffic Control, Kohima nem tetsür Best Traffic Award 2023 aser W. Nahfo Konyak T/C South Traffic Control, Kohima nem tebur Best Traffic Award 2023 agütsü. Tenaprong nem senpet den kulikakettem agütsüogo.

"Nagaland yimtiba nung traffic ketedangsürtemi kanga

dang meranga inyakba atema tenüng sang agüja iba mapa tila ka inyaker" ta NCSU President Pele Khezhie-i sempet agütsüang ashi.

"Traffic personnel mapa ya public-ibo balaka majiteter saka NCSU-i ajitetba atema tenüng sang agütsür. Kasaji contractors aser suppliers-i inyakba mapatem majiteter saka nenoki maneni mapa tajung inyaka aotsü imlar" ta Kohima SP Bharat Laxman Markad-i ashi.

Iba sentong nung Immanuel Baptist Church Pastor Zkiebeituo Metha-i Khristmas osang lemsatep.



Regional Agri Fair 2023 nung Nagaland Governor La Ganesan den ketedangsürtemi Central Agriculture University (CAU) kaket sayatsüba angur.

Dimapur, December 12, 2023

(TYO): North east state ajak nung sobaliba nungi benshia aruba den modern technology amshia aluyimba maparen inyaktsü tesayuba agütsüla, ta Ganesan-isa shisem.

"Mozü mamshii tsünüsénbongba ya tanü alima atema rongsen tulu ka lir aser teimba tsünütetba masü saka tajungtiba tsünütetba nung temulung agütsür" ta Ganesan-i ashi.

Agri Expo, 4th mile Chumoukedima nung Central Agriculture University (CAU) Regional Agri Fair 2023 nung jembidang "aluyimertem sentong ya Nagaland nung agri revolution adokdaktsü atema lir kechiyong Nagaland nung aluyimbaren wadang tulu inyaktsü sadema lir" ta Governor Ganesan-i ashi.

"North east nung chiyungtsü tapu balala aika anungji CAU-i North east state indang food atlas ka yanglu nung junger" ta paisa ashi.

"India sorkari Northeast region nem temulung balaka agüja aluyimba maparen asoshi maongka agütsür. Len shitak aniba den scientists ajanga

Lanuputu dang sobaliba nungi benshia aruba den modern technology amshia aluyimba maparen inyaktsü tesayuba agütsüla, ta Ganesan-isa shisem.

Iba sentong nung Nagaland Governor-i Dr. Janmejay Parhi (2022-23) aser Professor Angad Prasad (2021-22) na nem Best Extension Professional Award agütsü.

La Ganesan-isa CAU kakettem sayatsü aser NE state balala indang exhibitions stalls lapoktsü.

"Iba fair ya kanga tongtipang aser iba ajanga Nagaland nung alirtemi scientific aser sustainable agricultural inyakym angazütsü. Yamaji inyakra Nagaland ya major producer aser exporter tongti ka akümtsü" ta Deputy Chief Minister T.R. Zeliang-ia ashi.

"Asenoki technology tasen bendenlokba den inyakym tajungba akümba ajanga agripreneurs tashi itdaktsü" ta paisa ashi.

Iba sentong ya Central Agricultural University (CAU) Imphal ajanga ayongzük aser Ministry of Agriculture & Farmers' Welfare, Government of India ajanga teyari agütsür.

roadmap yanglura NE nung agri and allied sector kanga inloktsü lenmang sadema lir" ta pai ashi.

Paisa lanur kaketshirtem dang Agri-preneurs akümtsü ayongzük. "Iba ajanga nenok dang masü saka nür state aser linük ajangzütsü" ta TR Zeliang-isa shisem.

"Agri-preneurship renloktsü aser inyakym tasentem bendenloktsü atema lenmang sadema lir. Tanü entrepreneurs-i tetsükdaktsü aika ajurur saka tayongzükbatem ajuru nung ang renloktsü aser melenshitsü maongka angur" ta Agriculture Advisor Mhathung Yanthan-ia ashi.

"Asenoki technology tasen bendenlokba den inyakym tajungba akümba ajanga agripreneurs tashi itdaktsü" ta paisa ashi.

Iba sentong ya Central Agricultural University (CAU) Imphal ajanga ayongzük aser Ministry of Agriculture & Farmers' Welfare, Government of India ajanga teyari agütsür.

Mizoram CM Lalduhoma-i meinprong masütsüla: CM Biren Singh

Imphal, December 12, 2023 (Agencies): Manipur chief

minister N Biren Singh-i Mizoram chief minister Lalduhoma dang Manipur dak sendakba ken o tem nung meinprong masütsü shiogo.

Lalduhoma-i tawa Manipur kubok Moreh nung alir temsü benishiba olen kar jembiba sülen Biren Singh-i iba ya metedaktsü.

"Manipur nung ykmjung bener arutsü atema ang temulung agüjang" ta CM Biren-i CM Lalduhoma dang ashi.

"Mizoram nung Bru nunger tebilemtsü alidang ni kecha mashi. Anungji Mizoram CM tasenbai Manipur indang ken o atema mejembi tsüla, pai tebilemtsü jungjunga memetet" ta Biren-i ashi.

"Northeast state nungi chief minister ajaki yimjung bener aruba mapa nung yariteptsü mulungogo. Ni parnok den mapang shia Manipur dak sendakba osang metetpelar" ta paisa ashi.

Ajisüaka state kati tanga state ka indang maparen nung meinprong masütsüla ta Biren-isa shisem.

Bhajan Lal Sharma-i Rajasthan CM inyaktsü; Dy. CM. 2 shim

Jaipur, December 12, 2023

(Agencies): Bharatiya Janata Party (BJP)-i Rajasthan nung Chief Minister inyaktsü atema Bhajan Lal Sharma shimba osang metedaktsü.

Rajasthan assembly election nung Bhajan-i Sanganer assembly nungi Congress candidate Pushpendra Bhardwaj madak votes 48,081 agi takok ngua liasü.

BHJP lennir Vasundhara Raje-i

Chief Minister inyaktsü atema Bhajan Lal Sharma tenüng benok aser ibaji agizükba sülen Union Defence Minister Rajnath Singh-i pa shimba tenüng yimjak nung metedaktsü.

Bhajan-i December 15 nü Rajasthan Chief Minister inyaktsü atema tezüngzüktep agitsü.

"Nübertemi BJP dak nungi imlabama Rajasthan nung MLA ajaki inyaktsü ni nangzüker. Prime Minister Narendra Modi

lenisüba kubok Rajasthan nung kechisarena ajak renloktsü" ta Bhajan Lal-i ashi.

Gajendra Shekhawat, Mahant Balaknath, Diya Kumari, Anita Bhadel, Manju Baghmar and Arjun Ram Meghwal

Maneni, Rajasthan nung Deputy Chief Minister inyaktsü atema Diya Kumari aser Premchand Bairwa na shim aser MLA Vasudev Devnani-i Speaker inyaktsü.

AKM Tir Lanutoshi Aieri Minister Metsubo Jamir nem nungo ka senpettsuba mapang

Mokokchung, December 12, 2023 (TYO): Ao Kaketshir ayongzük. Paisa lanurtem dang coaching-ji süoki ia agiba den Mungdang (AKM)-i ayonga 5 buba 'We Care' kentenmenü sentong tuluka Dec 12 aonung yangi Imkongmeren Sports Complex, Mokokchung nung ayongzüka kaogo.

Taküm 'We Care-V' sentong ya AKM free coaching class asoshi corpus fund tenzüktsü ayonga katsür.

Iba sentong nung Aor nüntugu kentenrem-Tiameren Aier, Chubatsür Jamir, Tiaren Lusang, Akümsen Lemtur, Sünep Lemtur aser Lenen Jamir nungertem shilem agi aser menüshishir Dreamz Unlimited telokia jilushi ia tesenteprem kanga longsodaktsü. Iba sentong reprangi nisung meyi aika adenshia liasü.

Mezungbuba We Care sentongji 2005 küm Mokokchung nung tzümetüsü aser anentsü lendong nung tesama aser takoksa ajurterem atema ayonga liasü.

Tanabuba 'We Care' ji 2009 nung Free Coaching Class atema ayongzük, tasembubaji 2011 küm Ao Milen osang kaket asendenshitsü atema ayonga aka. 2017 nung pezübuba 'We Care' ji Mokokchung Law College atema ayonga liasü.

Education aser mapa angutsü atema dang masü ano pei sempet bushiteta renlokba tsütsülen temulung agütsütsü pai

Nagaland Law Students' Federation küm 25 jungogo



Capital Convention Centre, Kohima nung December 12, 2023 nü Nagaland Law Students' Federation küm 25 ajungba nüngtem nung ayongzükba sentong mezüngbuba nung Advisor, Law & Justice, Land Revenue, T.N. Mannen, IAS, (Retd.) ajanga kaketshirtem ayongzuka o jembidang tangokba noksa nung angur.

Dimapur, Luchii/December

12 (TYO): Nagaland Law Students' Federation küm 25 ajungba nüngtem nung sentong ka Capital Convention Centre, Kohima nung December 12, 2023 nü "Forging Equitable Justice" omen nung ajemdaker agia liasü.

Sentong tenzükba mapang Advisor, Law & Justice, Land Revenue, T. N. Mannen, IAS (retd.) ajanga Federation den tepela lemsatep aser legal education ajungketa legal profession renloktsü asoshi meranga inyakba atema tenüngsang agüja liasü.

Advisor Mannen-i kaketshirtem dang Law Federation aser college ajanga agütsüba maongka agia pei shisatsü ulushitsü, ajangzüksü aser professional network tashi

tait yangertsü ajungshia liasü.

Pai Naga nunger yimtenren ken o, Nagaland-Assam arütsü ken o aser Customary Laws amala nung tali temolung agütsüksü kaketshirtem ayongzuka liasü.

Loktiliba nung ajak kasa aser shidak inyaka alitsü asoshi legal profession yagi tongti shilem agiteter, ta pai ashi.

Advisor Mannen-i kaketshirtem dang nüburtem tenzükba mapang kanga kumdanga inyaksangshitsü, rule of law wazüka amshitsü aser social justice temaba jenjangi ajungkettsü ajungshia liasü.

Customary laws tem den lirumedema aotsü nüngdakba indang jembidang pai item ozüng tajungba kuma yanglushitsü ayongzuka liasü.

Nagaland Law Students'

Federation nung tetsürtem rongnugi tir mezüngbuba

Imliben Lemtur-i ashiba agi, iba benjongmung ya mapang süitema aoba indang temaitsü kisüng masü saka tashi temeteter temi ochi obendang asoshi bendanga agütsür inyakba indang lir.

Legal system nung tayongzükba jenti lir, anunji tarutsü tia tajungba kuma yangertsü asoshi kaketshir temi pei mapa metettsüla aser asangsang nung inyaktsüla, ta lai ashi.

Ozung metetertem adenshia law students ajungmesoba atema lai pelaba lemsatep aser külemi nükjidong tajung yur inyaktsü ayongzuka liasü.

Alumni züngsem Hukato-i iba Federation tenzüker nem akhum agüja liasü.

Dept.of Economics & Statistics ajanga SSS Sub-Scheme indang report saya

Dimapur, Luchii/December

12 (TYO): Department of Economics & Statistics, Government of Nagaland alizüng tasen ka tongteta SSS Sub-Scheme kubok reports tenet tashi saya liasü. Iba sentong nung tesemdanger tongti ya Advisor, IT&C, Evaluation, and Economics & Statistics, H. Sethrongkyu Sangtam liasü.

Iba sentong ya December 12, 2023 nü DES Conference Hall, Kohima nung agia liasü.

Item reports sayaba sülen Advisor H. Sethrongkyu Sangtam-i department nem tenüngsang agütsü aser mapang ka nung report tenet tashi takok ngua sayatetba asoshi pelaba lemsatep.

Pai department nem tenüngsang agütsü aser

department mashi nung mapa shidak inyaktsü asoshi data shidak alitsü kanga tongtipang lir ta ashi.

Economic & Statistics Department ajanga tongtipang shilem agiba indang pai ashi aser officers aser staff tem dang pei mapa nung temulung agüja inyaktsü ajungshi.

Paia department den maneni yariteptsü nangzük aser khen nung iba ama report sayatetba ya takok tulu lir ta ashi.

Sentong balala yangluba nung item report yagi state sorkar aser Nagaland nung aliba nüburtem kanga yaritsü imlar, ta Advisor Sethrongkyu-i ashi.

December 12, 2023 nü sayaba report tem ya Type Study on Other Services Sector in Nagaland, Study on Price for GSDP/DDP Estimation, Survey

on Urban Waste Management in Nagaland, Thematic Study on Cost of Cultivation on Major Crops & Agriculture Product Pricing at District Level, Survey on Minor Minerals in Nagaland, Methodological Development for improving SDP and DDP, aser District-Wise Projected Population of Nagaland from 2021 to 2030 alitsü.

Iba sentong nung menden ya Charles Nchumthung Kikon, Additional Director E&S liasü, aser Nedilhou Angami, Director E&S ajanga report tem agütsü.

Iba sentong nung Mohammad Ali Shihab A, IAS, Secretary to the Government of Nagaland

ajanga o tatsüka jembi aser KM.P. Themshao-i temeja ken ka aten aser Neisatu Puro, Additional Director E&S ajanga melepzüng o jembia liasü.

Dimapur nung mejangjaba nisung tasümgang ka nguteta lir

Dimapur, Luchii/December

12 (TYO): Old Flyover Bridge, Dimapur nung railway lenmang anasa ki ka telung nung nisung tasümgang ka lir ta Old Flyover Bridge Colony, Dimapur nung alir kati telephone ajanga December 9, 2023 aonung 10:30 ako meta Dimapur Police nemo sang agüja liasü.

Osang angashiba den külemi East Police Station, Dimapur nungi duty party tem iba tesemi arsanga ao aser railway track, Old Flyover Bridge, Dimapur nungi metre asem shi pilar ki ka telung nung arishi küm 60-65 tsüngta tebur (non-local) ka sü agi meyipanger süa aliba ngutet. Iba nisungba ya Gaon Bura

aser colony nung tenük kuli alirtemi mejangja aser iba nisungba ya anogo ter shi iba kidang shiranga liasü ta ashi.

Iba nisungba ya shiranga asü südi ta temolung melemi lir. Ozüng agi melaba maparen ajak inyakba sülen tasümgang ya post-mortem examination atema District Hospital Dimapur nung bener oa lir.

Iba nisungba ya jacket sentsü tanak, T-shirt sentsü tanak aser blanket sentsü temoru ka agi meyibanger liasü.

Kibur/kinunger/tembar temi Officer-in-Charge, East Police Station, Dimapur den Mobile No. 7085055020 ajanga tongteprateptsü akok, ta sangdong ka ajanga ashi.

CAU Regional Agri Fair nung Dog Show ali



Dimapur, Luchii/December

12 (TYO): Central Agricultural University Regional Agri Fair 2023-24 nung shilem ka ama Agri Expo, 4th Mile Chümoukedima, Nagaland nung December 12, 2023 nü Dog show aliba nung azü 50 dak tema shilem agia liasü.

Iba tetoktepbä nung Imkong Yaden-i metsüba Pixie, Dakshun breed mezüngbuba jenjang nguteta senpet sen 25,000 den sempet agizük, Lolano Patton-i metsüba Valerie, English Cocker Spaniel tanabuba jenjang nguteta senpet sen 15,000 den sempet agizüka liasü.

Shouka K. Yephomi meyong Cooper, Spitz breed tasembuba jenjang nguteta senpet sen 10,000 den sempet agizüka liasü.

liasü.

Mezung aser tanabuba jenjang asoshi senpet den gift hampers ya Drools ajanga sponsor asü aser tasembuba jenjang nem senpet ya Sky EC ajanga agütsü. Shilem agir ajunga nem sempet ya Drools, Sky EC aser Pedigree ajanga agüja liasü.

Iba Dog show nung tetendanger tem ya Dr Ithika, practitioner and proprietor, Wagging Tails; Dr Ekon, Practitioner and proprietor, Veterinary Health Care Center Dimapur; Dr Vikhe Sumi, Veterinary Assistant Surgeon, Veterinary Department, GoN aser Dr Tukheswar, Assistant Professor, Department of Vety. Gynaecology and Obstetrics, Veterinary College Jalukie liasü.

DIPR nung NBOCWWB documentary video tem sayatsü

Dimapur, Luchii/December

12 (TYO): Nagaland Building and Other Construction Workers' Welfare Board (NBOCWWB) ajanga Department of Information & Public Relations den lungjemer yangluba documentary video ana DIPR Conference Hall, Kohima nung December 13, 2023 anüngdang 12:00 ako nung sayatsü.

"Building Dreams: Journey of Naga Construction Workers" aser "All in Day's Work" nüngja agütsür aliba documentary nungya kisü-jensüba industry

nung lenla balala sayur.

Mezungbuba video ya Naga nunger kisü-jensürtem mapa building aser construction sectors nung mapa bushia state telungzük nung tesem balala sema jajaba indang lir.

Tanabuba video "All in Day's Work" ya immigrant tem Nagaland nung arua kisü-jensüba indang lir.

Director, Information & Public Relations, Dzüvinuo Theünuo-i sayaba sülen item video ya YouTube channel DIPR Nagaland nung reprangtetsü.



Beti Bachao Beti Padhao kubok Office of the Deputy Commissioner of Police, Niuland den lungjemer District Administration ajanga Exposure trip ka Government Higher Secondary School, Niuland nungi kaketshir 15 aser parnok tesayur asoshi ayongzuka Niuland Police Station nung Women Help Desk semdanga liasü. Maneni parnoki Women Police Station, Dimapur semdanga tetsür police ketdangsür den sensaksema liasü.



Tir Droupadi Murmu, Uttar Pradesh Angh Anandiben Patel, Chief Minister Yogi Adityanath aser tanga ketdangsütem Lucknow nung India Institute of Information Technology convocation sentong nung shilem agiba noksa nung angur.

MHA-i Gujarat aser Himachal atema calamity relief agizükogo

New Delhi, Luchii/ December 12 (Agencies): Union Ministry of Home Affairs-i Mongolbarnü menoknok, yipru aser tzümetsüng amala lendongtsütong balala ajanga teraksatsüba bener arutsüba atema senotsü teyari ama Gujarat nem sen crore 338 aser Himachal Pradesh nem crore 633 agütsütsü atema agizükogo.

Union Home Minister Office-i X sabang ajanga ashiba agi, Cyclone Biparjoy agi Gujarat dak kanga mejungi kongshiogo saka Ato Kilonser Narendra Modi tawabangba kübok Centre aser state-i lendong matalok tsüngda jelia jenjang tapet agir aliba ajanga nisung ka danga taküm mesama.

Yipru tesashi agi konshiba sülen Union Ministry of Home Affairs (MHA)-i state sorkari

teyari meshiba ata melei yipru ajanga teraksatsüba bener arutsüba asadangtsü asoshi Inter-Ministerial Central Team ka yoka liasü.

"MHA-i tanü Gujarat nem senotsü teyari sen crore 338.24 agütsütsü asoshi temelaba agütsüogo," ta Home Minister Office sangdong ka ajanga metedaktsü.

Centre-i taoba mapang parnok indang shilem mezungbuba instalment sen crore 584 bo State Disaster Response Force nem agüjatokogo.

Home Minister's Office-i tanga sangdong ka ajanga ashiba agi, Himachal Pradesh atema National Disaster Response Fund nungi senotsü teyari sen crore 633.73 agütsütsü asoshi temelaba agütsüogo.

Himachal Pradesh ya taküm

tzümetsüng, tzünglu kanga sashia aruba aser anentsüh aluba agi kanga mejungi kongshia liasü.

Lendong agi kongshir alirtem nem takaratiba nung teyari agütsütsü atema Ato Kilonser Modi inyakyim dak ajemdaker state sorkari teyari meshiba ata melei lendong balala ajanga teraksatsüba bener arutsüba asadangtsü asoshi Inter-Ministerial Central Team ka yoka liasü.

Jongdak tenüngdakbatem peritsütsü asoshi state sorkar nem teyari agütsütsü atema August 21 nü National Disaster Response Fund nungi jelia sen crore 200 agütsüogo.

Centre-i taoba mapang State Disaster Response Force indang shilem instalment anaprongla (sen crore 360.80) agütsüogo, ta Home Minister Office-isa metedaktsü.

Amit Shah-i puti otsü mejangja: Rahul Gandhi

New Delhi, Luchii/ December 12 (Agencies): Congress lenir Rahul Gandhi-i Mongolbarnü Union home minister Amit Shah aija, BJP lenir yagi puti otsü mejangja aser aiben zülushiba yimya ka lir, ta ashi.

J&K bills dak sendakba nung Parliament nung olangtepba mapang Ami Shah-i India indang mezüngbuba Ato Kilonser Jawaharlal Nehru indang jembiba sülen Rahul Gandhi-i iba olen lemsatepa liasü.

Parliament kima osangbenertem den sensaksema mapang, BJP-i aniba sorkari tongtibang ken o tem nung nüburtem meranglokdaktsütsü merangba atema Rahul Gandhi-i parnok aija liasü.

"Pandit Nehru-i India atema pa taküm bendanga agütsü aser pa tepuokdak küm aika liasü. Amit Shah-i puti otsü mejangja. Pai puti otsü jangja alitsü ni mimilar aser pa dak puti otsü zülushitsü yimya ka lir," ta Rahul Gandhi-i ashi. Paisa, ken o tongtibangji caste-based census aser shirnoki nüburtem sen achir aji lir, ta ashi.

"Parnoki item ken o tem sensak mesemner; item ken o tem nungi parnok ajener. Onoki item ken o tem tejakdangi bener aotsü aser sensakertem parnok kechi tangutsü tim aji agütsütsü. Chhattisgarh nung onok indang CM OBC nungi liasü, parnokia OBC CM ka shimogo saka inyakyim nung parnok shilem kwi lir aji asüngdangtsüla. PM Modi ya OBC category nungi lir saka sorkar ya nisung 90-i

yimsü asür aser parnok asem dang OBC lokti nungi lir aser parnok office kinük nung lir," ta Rahul Gandhi-i ashi.

Jammu and Kashmir dak sendakba nung bill ana indang Parliamentary nung o langtepba mapang home minister Amit Shah-i, aibelen balala menaba atema Nehru aija liasü. Mongolbarnü Rajya Sabha nung o jembiba mapang Shah-i ashiba agi, 1948 küm Pakistan den raraba mapang ceasefire dak sendakba nung aibelenba aser Kashmir ken o United nations dangi bena aibelenba Nehru-i nangzükogo.

"United Nations nung tajangshiba sülen idak nungjagi temulung süa telemtetba ka mangutsü ta asatetogo. Ceasefire asoshi telemtetba junga agiogo ta bilemer saka asenoki iba ken o ya tajungba achaayangteter lila. Ceasefire dak sendakba nung tali bilemdangtsü asü aser tera atsüük nung jungla. Ajisüaka item ya taoba mapang aibelenem lir," ta Nehru-i pa tebilemba lemsatepba indang Shah-i lepshia jembia liasü.

Nehru-i pa tebilemba lemsatepba indang lepshia jembiba mapang home minister-i, taoba PM-i pa aibelen agizükba indang jembia liasü. Shah-i, Congress züngsemtem dang parnokia Nehru-i aibelenba agizükba magizükba ta asüngdanga liasü.

Jammu and Kashmir Reservation (Amendment) Bill, 2023, aser Jammu and Kashmir Reorganisation (Amendment) Bill, 2023 Mongolbarnü Parliament nung agizükogo.

Bhajan Lal Sharma Rajasthan chief minister kümogo



Defence Minister aser Rajasthan indang BJP central Rajnath Singh, Rajasthan BJP tir CP Joshi, taoba Rajasthan CM Vasundhara Raje aser Rajasthan Chief Minister tasenba Bhajan Lal Sharma nunger Jaipur nung BJP Legislature Party senden nung tangokba noksa nung angur.

New Delhi, Luchii/ December 12 (Agencies): Bharatiya Janata Party (BJP)-i Mongolbarnü Rajasthan chief minister mapa abentsü atema Bhajan Lal Sharma shimogo.

Sanganer tang mezüngbuba election nung takok nguogo aser pa ya state BJP general secretary lir.

BJP-i Shivraj Singh Chouhan melena MLA Mohan Yadav chief minister asütsü shimba sangdongba sülen anogo ka lir Sharma shimba sangdongogo.

Chhattisgarh kong BJP puri December 1 nü sorkar kümpta

liasü, iba state nung tribal lenir tejen Vishnu Deo Sai, chief minister asütsü shimogo.

Kasa mapang nung Union minister Rajnath Singh densema central observer tem matsüngdang Jaipur nung BJP legislature party senden amenba mapang Diya Kumari aser Prem Chand Bhairwa na Sharma indang deputy asütsü shimogo.

Küm metsü tsüngda tang mezüngbuba BJP puri jelia chief minister mapa abentsü asoshi shinga meshimi election nung toktepa liasü.



Sabarimala Sree Ayyappan Temple nung facility aser security shitak maliba atema Kerala nungi MP temi Parliament Winter session agiba mapang New Delhi nung Gandhi kerkyanglu jakdang longkak aitba noksa nung angur.



TIR YIMYIM

YIMOBILEM (EDITORIAL)

DIMAPUR RASEMNÜ, DECEMBER (LUCHII) 13, 2023

India nung state ajak kasa

India telongjem kuboksa süaka Jammu & Kashmir state-bo linük temzung arla 370 ajanga yimten jenjang balaka lateta yutsür küm 72 aruba sülen, 2019 küm center nung BJP teloki aniba government-i iba arlaji linük temzung nungi agienba telemtetbaji shitak agiogo ta Supreme court nung obendangertemi metentsübaji BJP asoshi takok tuluka asütsü. Linük nung Congress teloki dang yimsüsü arur tang BJP teloki yimsü asüba mapang ya BJP teloki Congress mapang inyakba mapatem aika melenshia aotsü tebilemba lir. Item rongnung linük nung Jammu & Kashmir state nem yimten temeten balaka agüja aliba arla 370 agientsüba ya BJP election manifesto nung aliba tongtibang teinyaktsü ka liasü, anungji BJP telok asoshibo linük temzung nung arla 370 agienba ya election mapang nübortem dang nangzükba inyaker asütsü. Küm aika opposition nung alidang linük asoshi inyaktsü bilemba tongtibang mapatem aika BJP sentong nung lir aser item rongnung Ayodhya nung Ram tenla ki yanglua semzükba aser linük temzung nungi arla 370 agiener Jammu & Kashmir-a tanga state den kasasa jenjangi aludaktsüba mapatem ya asütsü. Linük temzung arla 370 ajanga Jammu & Kashmir state-bo India telongjem kuboksa süaka par temzung ozüng balaka lateta yimsü asütsü melaa liasü. Ajisüaka, 2019 küm center government-i iba yimten jenjangji agienba dang masü saka Jammu & Kashmir agi Union Territory-ang ana, Jammu & Kashmir aser Ladakh ta kümtsübajibо meimlaba mapa ka liasü. Ibajibо Kashmir nunger asoshi yimten jenjang tilaba kümtsüba dang masü saka alima dena tilaba kümja lemdangtsüba mapa ka liasü. Atangji, Kashmir nunger yimten lenirtem talisa Farooq Abdullah, Omar Abdullah aser Mehbooba Mufti nungertem asoshi center telemtetbaji parnok mezüngmeshiba mapa ka liasü. Ajisüaka, tsüraburtemi jembia aru ama, yimten nung kenü tenem bang aser kenü pokbo bang ta ataloktsü asünungji, linük temzung nung arla 370 ajanga Jammu & Kashmir state-bo India kuboksa asüyonga temzung balaka nung yimsüsü aliba agienba anemaji joko shingaia kecha meshitetsüsa kümogo. Atangji, kasa linük aser kasa yimtena ser nung karbo pei juri temzung balaka nung yimsü südaktsütsübaji tim masü, kechiyong linük ka dang sura ajak atema temzunga ka dang asütsüla. Ajisüaka, tanü tensa alirtemi zübazüba bilemer dang ashi, küm 75 jakdang India yimten nüchiso anguba mapang India lima tensa tiaji tanü ama masü, saka chuba yimli tilala 570 shi lemsar, iba madak British nungertem yimsüsü liasü. Ano, British yimten talenba nungi India yimten nüchiso anguba anogo ya India nunger asoshi pelatepba anogo masü saka India nunger agi telok ana, Hindu aser Muslim ta kümter azü tokshia raraba anogo liasü. Aji oda, yimten nüchisobo angu saka pei taküm aser kibongbo mekümzükteti Hindu aser Muslim nunger aika taküm sama aser kinungertem rongnuga kodanga majuruteptetsüsa jepa pilaba temulung ashitsü otsü aika ataloka lir. Iba ama mapang ka nung, Jammu & Kashmir nung ya nübortembo teimbaka Muslim nunger saka chubabo Hindu nunger Maharaja Hari Singh liasü. Pai pa chuba yimli mesamanü, anungji India aser Pakistan nüchiso anogo sangdonger külena ita anabo pai India dena aser Pakistan dena medeni ata. Ajisüaka, Pakistan nungi Pashtun kini par yimli makyonga aru aser parnok anemaji pai menokdakketi India teyari meshi. Ajisüaka, India-i Maharaja Hari Singh dang pa India nung medenra Indiai meyaritetsü ta ashiba agi, pa India den medennüseti adentsüsa aküm. Aji oda, 1947 küm October 26 nü Maharaja Hari Singh O India na tangatettpe ken o kar renem aser Jammu & Kashmir India telongjem kuboki ait. Ajisüaka, Maharaja Hari Sing o India na tsüngda renemba October 26 ken o ji Pakistan-i magizük aser kasa ken o ji UN nung benok. Ibayongji, tanü tashi Jammu & Kashmir yimten ken o yabo UN sabang nung dang latettsüla ta aikati jembir. Item tensa tiaji tanü ataloker ama bilema kodang asenoki shisadangdir, Jammu & Kashmir nem yimten jenjang balaka agütsübaji tim dang liasü. Aji oda, küm 75 sülen Jammu & Kashmir yimten nung temelenshi atalokbajia ataloktsüla ataloker asütsü.

OLEMSABANG

Asür Lim (Source- Sobaliba Mongchen 2015)

~ Er C. Kazükaba Jamir.

Kodang asenok akümlı wadang ya tembangdir ammang sangwa balaka aliba lima nung alir aser iba lima dangji asür lim (Asür lima) ta ajar.

Oboula nunger Chungli yimti lima alidang tasüba malı asü. Künep yimer tar tasen mapang sünko ka lung tulu ka manung süa angu (Iba jagi lungpak sungko ta aja). Ibai Chungliyimti alir asoshi mezüngbuba tasübaji liasü. Anungji parnok ajak sungmangtep aser ken ka yamai tenloktsü:-

Chungli yimti alir;
Meyu trok temsenpang nung;
Ali tsüngrang naro;
Longpak yakiang;
Tsüyua karo ne;
Yongpang Tsüngrem Omatisung
Kodak Tsüngrem Omatisung
Chungli yimti alir
Among monga ;
Ne mang yimera ne.

Iba sülen parnoki longpak sünkoji ali nung rema yutsü aser lepko among. Parnok asoshi ibai mezüngbuba asünung anogoji telemtetmekai monga liasü. Chungli yimti alir asangur aso ajen tajung ka sotet. Pa tenung Songmaket liasü. Paji tenem pen agi aküm ta yimeri jembi. Yimer tenük merem ajanga paji Tzula ayong (Dikhu) Wazat moti (azü) nung semeta südaktsü.

Kinungertem pa mang bushia ao nnung Wazat moti anasa süngeong ka nung tenem ozü aika tema (mena) liasü.

Parnok yimzüka aluli moti nungji penzür shi tila majiteta bener adoka asetkong nung rema yutsü ta angu. (Iba jagi iiba azü dang penzü zü taka ajar ano Songmaket mangji tenem ozü remtsüba agi, paji tenem pen agi aküm ta jembiba tu shidak ta kuli angu).

Parnoki anogo ishika monga ata nung ozütemi troknü tashi nung shiji agiteta remma aser tenetnü buba nung tzü chigur senshi. Ozütemi inyakbaji ngua Chungliyimti aliri idangnungjagi nisung sur kulen anogo troknü lepko amonger aser tenetnü bubaji chiguzuki aor.

Ni tanur aliba mapang nisung ya kodang südir Mongzüa akümer ta jembia angashi. Tain akümdang ibaj shidaka ta ajangshia aru. Kodang nisung ka südir, iba second nungji Longküm kirtsüng nung aliba Mongzü ki nungi Mongzü ka yimteta aotsü aser asem nü buba nungji tasür kilem anasa yimzüa arutsü. Lepko amongertem Mongzü dang "na pa toa na"? ta asüngeangra hau ta asüba tamaitü la tashikang ayipshia sayuli ta sa angu.

Tsürabur mapang nungi nisung sur kulen tanelabo asemnübuba nung dang ki toktsür aor ta jembi. Iba anogo nungji asen tsüraburtemi asür meinoktsüba tekülem ka agia aru. Iba anogo dang asenoki Menzük ta ajar (Adianu sosem ajak anogo asem nü tashi mena kazürji joko ojang mendi ta tatemsamenba anogo asüba agi menzük ta ajar).

Nisung sur kulen anogo asemnü tashibo tanelaji kidang alir asünungji menzük tashibo asür nema chiyongtsüsa yutsü. Menzük temer kulen nungibo akümlir chiyongba shia pa dang chiyongdi arung ne ta dang shia aru.

Menzük tekülem sentep ya asür den tepila sentep (farewell) ka lir. Iba tekülem sentep temer dang parnok khu renemer apusoa aotsü. Aji asünung iba tekülem sentep ya angjungmeshi (12 noon) tashi nungbo tema adoktsüla. Kodang asürji khu ajak tak ta renemdir/ mapang tongdir menüngraseta kidang nungi apusotsü.

Mapang talangka agia belemseta jajar Nokritzü ayong atongtsü. Yangji tzü ajemtsü asoshi tekupu anatsülen külemi senteper tendak nung tzü mejemtet. Pai reprangdang nung temeyong dak aliba shi ajak shizüka or teret dang anungba agi liasü.

Timtim jenti agia tzüji jemer anosa apusoa ao. Joko Nokritzü ayong ajangerbo asür lima liasü. Yang nungibo mopong tanüp aoner, süngeong lidong tapu balaka aser ammang sangwa balala. Iba lima dang asür aliba lima ta ajar. Ano Tipu temlen taka ajar. Yang nungibo lenmangji kanga atang tasa. Tzüraburi iba atang dang senti atang ta aja.

Senti atang nung khu taret bener mapang talangka aniseta jajar laza süpu atongtsü (lung temesung agi sunga lir- talang nungi sü temesung pudaka ayu ama anguba agi auiri sü apuba ta jatsü) lazü süpu nungi anisungzüka mener anosa apusotsü laza süpu nungibo lenmangji lenden, tesadem aser kanga temetong ta ashir. Yang nungibo lenchir aika den ajurutepa pelatepa jajayonga aotsü.

Tatem nung talang nungi tepur tajung sentsüprang ki ka angur. Ibai Meyutsüngbar ki. Pai tasür ajak O bendanger. Par kima kilemji (compound) kanga tesadem. Kima tiyong nungji taküm süngeong ka lir. Tasürtemji kodang Meyutsüngbar kimaji tongdir pai O bendang tenzüksü. Pai tebur nem nü aser tetsür nem alem ta agütsütsü. Aser süngeong nungi tsüngshishidaktsütsü. Sungdong nungi tsüngshir tem ajak tepeladak kodaki yoktsü. Meyutsüngshir tem ajak molumi leni yoktsü.

Otsüla oboula nungeri ashiba agi akümlı nung alidang shirnoki tiyazı jembir, ochi mashi mapä inyaker, auyar, nisung tepseter parnok sur kulen tanela jagi meyutsüngbar kima süngeongji metsüngshir ta ashir. aji asü nung asen tenelai Meyutsüngbar kima süngeong nungi tsüngshir teti asoshi tepela anisüngzük dak alitsü atema asenok ajak akümlidang ochi shia alitsüla ta tsüraburi jembia aru.

**Iba Olemsabang nung lemsaba ken-o aser shisatsü ya iba ocet züleri
bilemba ken-o ama tazüngeri angateta agitsü mepishir**

NBCA Kohima Region Sub-Centre team tasen shimogo



Kohima, Luchii/December 12 (TYO): Nagameese Baptist Churches Association (NBCA) Kohima Region Sub-Centre team tasenba mapa nung anioka sarasademsüba sentong ka December 9, 2023 nü Christian Union Baptist Church, Jotsoma nung agia liasü.

Kasa sentong nung NBCA-KR Constitution agizüka liasü.

NBCA Kohima Region Sub-Centre team tasenba nungya Chairman, Rev. Velavoyi Keyho, Phezoucha Nagameese Baptist Church, Kohima; Vice Chairman, Pastor A.K Sangma, Christian Union Baptist Church, Jotsoma; Secretary Ketoukho Mere, Nagameese Church, Naga Bazar; Treasurer, Kuolachalie Seyie, Chairman, Deacon Board, Eklektos

Church, Kohima; Evangelist Secretary, Pastor Ruokuolhoulie Solo, Flames of Fire Baptist Church, Kohima nunger den Advisors Khotuo Yaotsu, Flame of Fire Baptist Church, Kohima aser Pastor Amongba Yimchunger, Nagameese Church, Nagabazar nungertem alitsü.

Nagaland Baptist Church Council (NBCC) ajanga Nagameese Baptist Churches Association (NBCA) Kohima Region Sub-Centre ya constituent association ka ama 2017 nung sangdonga liasü, saka osangtsüsang junga magitepba ajanga anendaka liasü.

Ajisüaka arogo balala ka kuma lungjemtsü nüngdakba ajiteta tanaben tentetshi.

Brian Houston-i taruba küm online ministry aser arogo tasen amenoktsü

Canberra, Luchii/December 12 (Agencies): pastor indang code of conduct sayutsüngia liasü, ta lenirtemi aija liasü.

Ano pa anema ashishitep ken o ka benokba nung 2013 küm staff ka dangi tim masüba text message yok, ta Houston dak tai tongloktsü. Mapang tatsüka lir iba staff ya mapa nungi anen.

Ita ishika lir Houston-i Hillsong nungi pilaba sangdong aser tim masüba mapa inyakta tai tongloktsüba aser Hillsong lenirtemi pa jenjang nung tarak ketja nüburtem dang sangdongba mech i anener ta ashi.

"Bobbie künati 2024 küm hopta shia online ministry aser arogo ka tenzüktsü. Iba arogo tasen yangertsü ni kanga pelar," ta pai ashi.

Pai iba dak tali osang mesangdong saka par jala Laura Toganivalu aser la kinungbo Peter, tena Hillsong indang youth ministry Hillsong Young & Free nung lenir mapa nungi anener mapang talangka melie iba osang ya sangdonder.

2022 küm Hillsong indang global senior pastor ka ama mapa nungi anenba sülen küm ana Houston asoshi kanga timtema aruogo. 2019 küm arogo annual conference alidang pa yi aser mozü agi meseper mejangjaba tetsür ka aliba hotel room nung oa minute 40 shi arogo indang agidaktsü.

1970s nung tebo asür Frank Houston-i tim masüba mapa inyakba pai meimbang ta tai tongloktsüba nungi Houston ya küm tetenzüklen temeden ngua liasü.

Pai teti aibelen masü ta shia aru aser Sydney court ajanga pa bhukuma obendang agütsü aser timtem ajuru aliri police nem memetetdaktsünür südi ta pai amangba yong tebu-i tim masüba mapa inyakba osang magütsü ta kuli tejangja ngutet, ta ashi.

Ajisüaka pa yi jemer gari aniba asoshi taküm Houston-i tai nangzüka liasü aser küm asem probation den senchi sen \$140 achi. DUI offenders asoshi yangluba alcohol programme nunga pa shilem kaket aser laptop tem den

ANOGO ABEN TSÜNGREM DEN

Tesendaktep Khristan shia anepalur kaka lir

Efesa 4:29-32

Medemer o medemer na khu bentepang, aser aji oda Khrista ozüng atalokjang.

Galatia 6:2.

"Ne mapa nung temulung agüjang". Lairen o masü. "Kati ka khu bentepang. Nenok shisa buluba ajak Pa dak yuang, kechiaser Pai nenok asoshi anepalur" (1 Peter 5:7). Asenok anepalur Tsüngrem lir. Asenok kümzüktsü asoshi Pa chir yoktsü Pai anepalur. Pai anepaluba ashitsü Pa Tanelai asenok ajungmesor. Asenoki Pa ama kümnera kati ka asoshi anepalutsüteptsüla.

Tsüngremi asenok arogo - tamang telok ka nung yutsü - idangji kotak lemang nung noktaktsü asenok kati ka dang yaritettsü.

Akhidang arogo nem agütsüba ozüng tanüa amshir: "Adianutem, nisung ka langka tai nung pura, nenok Tanela akartemi pei indang biledanga, peisasa tatitang ngua lir ta, tanela ajemaluba nung iba nisung meyipdakjang" (Galatia 6:1).

"Ibai kù mapa masü" kodang ochi masü. Tangari kechi inyaker iba lagi asenok dak kechi inyaker aser asenoki kechi inyaker iba lagi tangar dak kechi inyaker. Tangar ajangzüktsü asoshi asenoki Yisu tenüng nung jembitsüla aser inyaktsüla. Ibaji asenok mapa asütsü Tsüngremi yanglu.

Tangar Khristantem temeim asenoki nüngdaker aser tangar Khristantem asenok temeim nüngdaker: "Ajak dak alia, kati ka dang junga meimteptsü kechiaser temeimi temenentem nembanger" (1 Peter 4:8). Tsüngremi tuyur.

Sarasadem : Temeimba Kibur, kotaker Obala, tajuruteper ajak dang Khrista temeim indang ashitsü ni asoshi mapang tajung südakjang. Amen.

India nung anti-conversion laws agentsü ajungshir

New Delhi, Luchii/December 12 (Agencies):

Mangattep aliba anti-conversion laws kübok Khristanpur noklang aika apuba osang angazükba sülen India nung tamangba yimsü tsütsü nütsüng tajemba alirtem indang tamangba yimsü temeden wazüka ayutsü asoshi tali inyaktsü ajungshir.

Küm asem jakdang iba ozüng benokba sülen Uttar Pradesh state nung Khristanpur 398 -timba Protestant pastors aser arogo züngsemtem - puogo ta UCA News ajanga ashir.

Taoba ita tatemlena Uttar Pradesh nung pastor 27 densema Khristanpur 42 apuba osang balala lir.

Tiazü mapa inyaka tribal nisungtem aser maka maiter tem tamangba yimsü melendaktsütsü merang ta ashishitep ken o benokba sülen parnok ya apu. Osang ajanga ashiba agi, police temi parnok indang Laishiba, ken kaket aser laptop tem den

telok nungi nisung ana apu, tepsetogo," ta pai ashi. ta osang ajanga ashir.

Manipur nung Alima tesem balala nung Khristanpur dak tenük yoker ita aika azüdokshia aruba aser taruba küm election agitsü lia iba osang ya arur, aser maneni Hindu nationalist BJP tali tashi itshitsü tsüber, ta Release ajanga ashi.

"Tang atalokba yimya nung asadangra, India nung Khristanpur reshikangshiba tali akumtsü," ta Robinson-i ashi.

"Küm shia ozü partners temi India nung Khristanpur tali reshikangshiba osang agütsür."

Anungji azüdokshi ajemtsü mech i ba anti-conversion laws ya agentsüla, ta pai ashi.

"Alima nung democracy tulutiba intolerant society akumba asenoki angur. Tamangba yimsü tsütsü telok tilatem anema mapa tamajung inyakba nokdangtsü aser ant-conversion laws agentsü Release International ajanga India sorkar dang akhanger."

"Pastor tem dak züka merenshir aser kar

AO OSHI ANGAZÜKDAK:
TANÜ ANGAZÜKTSÜBA OJANG
**Sentsühlutem**

(adj) sentsüh meküpdang toktsüba (unpaid debt)

* Tsürabur sentsühlutem agi tanurtem timatemer.

Sentsühtsür

(n) sentsüh aliba nisung (debtor)

* Sentsühtsür nisung shisabolua dang alir.

OLONG PAITEP # 6642

1						2			3
							4		
5		6				7			
8									9
							10		
						11	12		
13									
14						15			
		16							

TIPLÉN

- | | |
|--------------------------------|-----|
| 1. O jembitsü tashi | - 8 |
| 5. Süngjang tapu ka | - 5 |
| 7. Tekanük nung enokba | - 5 |
| 8. Teka amtep | - 5 |
| 12. Tzük asendak | - 5 |
| 14. Tsüngpang tema aliba | - 5 |
| 15. Ken atenba yimya | - 5 |
| 16. Asangur | - 8 |
| | |
| LANGTSÜNGLEN | |
| 1. Tepok telung nung shilem ka | - 7 |
| 2. Tamajung aküm | - 5 |
| 3. Chi den küleme achiba | - 3 |
| 4. Meimchir alimai aruba | - 3 |
| 6. Laishiba nung ayong ka | - 4 |
| 9. Tarutsü nükla | - 7 |
| 10. Tamendakdak/Nükjidong | - 4 |
| 11. Tenük-telen mejungi aküm | - 5 |
| 13. Terok nungi adokba | - 3 |
| 14. Meimchir telemsa | - 3 |

OLONG PAITEP # 6641 TELANGZÜBA**TIPLÉN :**

- | | |
|--------------------------------------|--|
| 1. Taa, 3. Teküm, 6. Aibelen, | |
| 7. Aut, 9. Ajizük, 10. Ojala, | |
| 11. Semer, 13. Sen, 15. Kioctsü, | |
| 17. Itsük, 18. Kar. | |
| | |
| LANGTSÜNGLEN : | |
| 1. Tai, 2. Asensor, 3. Tanü, 4. Kua, | |
| 5. Mitsüksü, 6. Azübenshi, | |
| 8. Lah, 9. Jangkok, 12. Akok, | |
| 14. Nashi, 16. Sür. | |

NAI-A YA METETTER MA

Air India-i December 12, 2023 nü parnok pilots aser crew members atema uniforms tasen sayaogo. 1932küm tenzükba sülen Air India-i tang mezüng atema crew uniforms melenshir aser iba ya parnoki Vistara aniomka mapang ka nung inyakogo. Air India-i taküm küm tatemlen tashi nung uniform tasen amshi tenzüksü aser parnoki fashion designer Manish Malhotra nem flight crew, ground staff aser security personnel 10,000 atema uniforms design südaktsü. Air India uniform tasen nung India'er sobaliba senmang nem tushia deep red, burgundy, aubergine aser gold sentsütem amshia lir. Tang ya Air India jenjang tajung akümtsü merangba mapang ka lir aser taküm küm tetenzükleni Air India-i Boeing aser Airbus dang nungi tayimtsü 470 tashi order süogo.

Manipur nung arishi küm 40 tematetsür shia Rs 6000 agütsütsü



Imphal, December 12, 2023

tetsürtem parnok kibong (Agencies): Manipur nung arishi küm 40 ser temapur tetsür ajak nem küm shia state sorkari

Rs 6000 agütsütsü ta chief minister N Biren Singh-i ashi.

"Arishi küm 40 ser temapur tetsür shia nem ita nung Rs 500 agütsütsü aser iba ajanga

nüngdak nung yaritsü" ta pai ashi.

"Sorkari schemes aika tenzükogo saka arishi küm 40 nungi 60 tsüngda tetsürtem

mezüngok lir" ta Biren Singh-i ashi.

"Iba scheme dang Ima

Nongthangleima Yaipha Tengbang ta ajatsü aser tetsürtem tashi itdaktsütsü nükjidong nung tenzüker" ta paisa ashi.

Iba scheme ajanga Manipur nung tetsür lakh 4 shi ajangzüksü alizüng lir ta CM Biren-isa ashi.

Mizoram nung BJP aser MNF züngsemtemi ZPM nung aden

Aizawl, December 11, 2023

atema Congress züngsem kari ZPM nung adentsü akok ta osang angazüker.

Taküm May 9 nü CADC election agidang MNF-i menden 10 nung takok ngua single largest party aküm. Külen BJP-i menden 5 aser Congress-i menden 4 nung takok angu.

ZPM nung adenba Members of District Council (MDCs) 6 rongnung council chairman Kali Kumar Tongchangya dena lir.

Taküm November nung assembly election magidang BJP züngsem pungu ya MNF nungi aruba liasü.

Ano Chakma council nung ZPM-i aniba sorkar akümtsü

Züngsem 20 agi akümba CADC nung executive body tentettsü atema menden 11 nüngdaker.

Tang MNF züngsem 11 ajanga Chakma council nung tashi amshir.

Ajisüaka Chief Executive Member (CEM) Rasik Mohan Chakma-i November 7 assembly election nung Tuichawng menden nungi takok nguogo aser pai MDC aser CEM nungi sodi agitsü asü masü'ar ano lemtet kecha magi lir.

CADC ya 1972 küm Mizoram nung Chakma kin atema Indian Constitution sixth schedule kübok tentetba liasü.

Assam IPS officer Anand Mishra-i Manipur SIT incharge inyaktsü

Guwahati, December 12, 2023 (Agencies): Manipur

Superintendent of Police (SP) inyaker.

Supreme Court-i tuyuba ama Mishra ya SIT incharge kümdaktsü ta osang angazüker. SIT nungsa Assam Police Service personnel Randip Kumar Barua enoksemogo aser iba ajanga tenaprong Manipur-i transfer asür.

Assam Police nung Mishra ya nüngtugu ketcangsür ka lir.

Pa Lakhimpur-i maodang Nagaon nung SP inyaka liasü.

Nagaon nung Mishra-i SP inyakdang police-i drugs anema mapa ka inyakdang Kirti Kamal Bora ta ser kaketshir lennir ka khasetba sülen pa mapa belena liasü.

Manipur nung nung Myanmar arrtsü anasa IEDs 21 angu noktangogo

Imphal, December 12, 2023 aliba noktangtetogo.

(Agencies): Bongyang anasa National Highway 102 nung improvised explosive device (IED) tesashi ka pokdaktsütsü

Manipur kübok

Myanmarden arrtsüa aliba Tengnoupal district nung Mongulbarnü iba lendong

Bongyang nungi Sinam yimtsüng lenmang anasa Assam Rifles road opening party katı high-powered IEDs 21 aser wire coil asem tashi angu.

Telungpurtemi Imphal nungi Moreh sendaktepba national highway nung IEDs ya yuja liasü. iba lenmang nung civilian aser sepai gari aika senzür ta Assam Rifles-i ashi.

Tapoktsü anguba sülen bomb experts telok ka ao aser bushisüngdanctsü atema anasatiba police station ket nung tapoktsütem agütsüogo.

Indian Army aser state forces ajanga Manipur nung telungpurtem anema mapa inyaka arur.



Gaza Strip nung Hamas telungpuri pia aliba kinunger aser tembar temi pua alirtem tia sayua Tel Aviv, Sirael nung aliba Museum of Art indang Hostage Square nung parnok choiktsü khanga tenük zübanger mena aliba angur.

South Korea-i Russia dang North nem tenokdangba agütsüsü mepeshi

Seoul, Luchii/December 12

(Agencies): North Korea-i tawa spy satellite ka yokba dak sendakba nung tenokdangba tasen agütsüsü atema Russia-i teyari agütsüslü aser North indang labour exports dak sendakba nung tang tenokdangba agütsür aliba ya benoka inyaksangshitsü nüngdaker, ta South Korea nunger ketdangsür kati Mongolbarnü ashi.

South Korea indang unification minister aser inter-Korean tesendaktep in charge Kim Yung-ho-i ashiba agi, taoba ita satellite ka yokba ya U.N. Security Council bangzüng anema lir, kechiyong iba ajanga ballistic technology mamshitsü atema North Korea nem tenokdangba agütsür lir, ajisüaka Russia-i Pyongyang nem tenokdangba agütsüsü asoshi kecha jenjang magir.

Pyongyang aser Moscow na tsüngda military tesendaktep lir aser UN bangzüng anema

Russia-i North Korea nunger mapa inyakertem agizük magizük iba indang Seoul-i asadangdar, ta Kim-i ashi.

"Security Council nung permanent züngsem ka ama bangzüng shitak benoka inyaktsü Russia tinyaktsü lir," ta pai news conference ka nung ashi.

South Korea indang intelligence agency-i taoba ita ashiba agi, satellite yoktsü atema North Korea-i Russia nungi teyari agizükogo. Satellite yoktsü atema anaben tashi tamakok anguba sülen tasembenbuba nungang iba satellite yoktetogo.

North lenir Kim Jong Un-i September ita Russia semdangba sülen bendanger sen aazüksü atema North Korea-i mapa inyaker noklang aika Russia kubok anütokleni yokogo, ta sorkar ketdangsürtemi ashiba South Korea indang Donga Ilbo osangkaket sangdong ka ajanga Mongolbarnü metedaktsü.

Minister Kim-isä, North-i prangbong hadir balala aika yangluyonga aoba dak sendakba nung tenokdangba agütsüsü asoshi China dang shilem tajungba agitsü mepeshia metedaktsüba den international inyakyim sülen anidaka North Korea nungi jena aoertem tashiyim agi meyipa meyoktsü shiogo.

South Korea nunger activists temi ashiba agi, October ita China-i North Korea nunger 600 meyipa yokba sülen parnok ya samaogo.

Kim-isä, North Korea lenir Kim Jong Un'era jala Kim Ju Ae yimjak nung aibena shilem agiba ya tarutsü nung pa melentsü atema tangyongi jenjang agia ataba ama reprangteter, ta ashi.

La 2022 küm November ita mezüng yimjak nung shilem agiba sülen state media nung 19 ben adokogo aser la ya timba ka military sentongtem nung tebu den küleme shilem agia aruogo, ta pai ashi.

Office of the MERANGKONG LAISHIR TELONGJEM

Merangkong: Dist. Mokokchung: Nagaland.

TENÜNGSANG AGÜTSÜR

Takok ajak Tsüngrem nungi lir, aser tematiba jenjang tongtettsü shisatsüja Pa nungi angur. Saka shirisa bendanga aguja bushir parnok nem dang iba temaba jenjang agütsür.

Tanü Wb. Akangtemsu Yaden ajanga 98th Senate of Serampore University nungi Master of Theology degree nung tematiba jenjang ngutetba asoshi Merangkong Laishir Telongjem ajanga masadangtet tepelaba lemsateper. Maneni tarutsü nung takok tulu angutsü sarasademsür.

Tsüngremi pa taküm aika asoshi temoatsü aser takok bentsür nisung südakjangma.

Sd/-
Limasangwa
President, MLT

Sd/-
Arenla Imsong
Secretary, MLT

UK-i minehunters ana Ukraine dangi yokogo

London, Luchii/December 13, 2023

"Minehunter tem yagi Ukraine nem tashi agütsüsü aser iba ajanga tzüyim nung nisung taküm aika kümzüksü aser osütsüt belenshitsü atema tongtibang lenmang lapoktsüsü, koba Putin-i ozüng alema Ukraine amak tenzükba sülen kanga mejungi kümogo," ta Shapps-i ashi.

"Iba jenjang agiba ya UK, Norway aser onok den sendaktepa aliba linktemi Ukraine indang maritime capabilities tashi itshidaktsüsü atema bendanga agütsür aliba tenzükhiba temaitsü ka lir aser iba ajanga linük tzüyim wazuka ayuba aser Black Sea nung security akangshiba nung teyari agütsüsü," ta pai ashi.

Iba telok yagisa Black Sea nung Ukraine indang Navy atsülangtsü, Ukrainian Marine Corps ka aser inland aser coastal waterways kümzüka ayutsü atema river patrol craft amshiba jenjang ajungketsüsü asoshi teyari agütsüsü, ta ministry-i ashi.

Russia-i mamak tsüngda UK aser Ukraine na minehunters ana atema 2021 küm June ita tenangzüktepba yangluia liasü. Ukraine nunger sepaitem taoba küm nungi iba rong nung training agidar. London-isa, taoba küm tsüngda Ukraine nunger sepi 20,000 shi nem military training course agütsüogo.



Rawalpindi, Pakistan nung aliba Adiyala prison nung taoba Pakistan ato kilonser Imran Khan anema Cipher ken o jembitsü asoshi amenokba special court nung adentsü asoshi Khan teyi Uzma Khanum (tiyong) aser Aleema Khan (abelen) arudang tangokba noksa nung angur. 2022 küm April ita parliament nung no-confidence vote ajanga Imran Khan ato kilonser menden nungi atsüngdokba sülen pai 'confidential diplomatic letter' ka lokti dang ayipshia sayuba ken o iba court nung jembir.

Nawaz Sharif den kanga jinga metettepa alir kari ashiba agi, iba obendang ya Nawaz Sharif anema tasa tamajung yanglur ajunga madak takok anguba lir. "Ya tashi timtem agütsür asoshi ibai maksü lir," ta parnoki ashi.

Nawaz aitsüba ken o ana rongnung Al-Azizia ken o ya ka lir, koba ajaga pa tepuokdak küm tenet ayutsü aser senchi sen million \$25 achitsü obendang aguja liasü.

Saudi Arabia nung Al-Azizia Steel Mills aser Hill Metal Establishment (HME) amenoktsü asoshi sen aruba kuli magütsüteba ajanga Sharif er kibong dak rangloker iba ken o ya benoka liasü.

Asemen tashi Pakistan indang ato kilonser inyaka alisang ya December 2020 nung 'proclaimed offender' ta sangdona liasü. Temang

Trial court ajanga obendang agütsüba ya Nawaz-i agütsüba civil miscellaneous applications nung ajemdaker masü saka Maryam Nawaz, Hassan Nawaz aser Hussain Nawaz nungeri agütsüba civil miscellaneous applications nung ajemdaker lir, ta Pervaiz-i ashi.

Hussain Nawaz-i 2016 küm interview ka agütsüba nung ajemdakba asoshi okatsüri maneni aitsü aser iba mapang jembiba ya Nawaz indang masü ta ashi.

Item company ya Nawaz meyong lir ta kuli monguteter, ta Pervaiz-i nenshia ashi.

NAB prosecutor Azhar Maqbool Shah-i kanga tekong meranga nokdak aser item reference ya accountability

Li Ning North East Invitational Badminton Tournament 2023 asayadagi



Li Ning North East Invitational Badminton Tournament 2023 tenzükba sentong nung 12 Assam Rifles Commandant Col.Rahul Gurung-i jembidang tangokba noksa angur.

Mokokchung, December/ Luchii 12 (TYO): ajungkettsü mangdang tulu nung Mokokchung District Badminton Association, Mokokchung District Sports Council aser Nagaland Badminton Association senteper iba Li Ning North East Invitational Badminton Tournament 2023 ayongzükba ya kang dang mapa tajung lir ta tepelaba o ashi.

Iba Li Ning North East Invitational Badminton Tournament 2023 ya Nagaland nung Badminton asaya tenzüker küm 50 abensaba tenüng nung ayongzük aser yangi Women's Doubles, Men's Doubles, Men's 75+ doubles, Men's 85+ doubles, Men's 95+ doubles aser Men's 105+ asayatsü aser sen senpet ajak agi Rs.4 Lakhs only agütsütsü.

Tournament tenzükba sentong tatsüka agidang tetushi tejaoker 12 Assam Rifles Commandant Col. Rahul Gurung-isa adenshia aliba nüburtem den lemsatep.

Sentong nung Tsüngrem nüburtem talisa lanurtem Badminton asaya nung Concern Co-Ordinator

Limasangwa Longkumeri sarasadema tenzükba den Mokokchung Deputy Commissioner Thsuvisie Phoji aser MDBA President Martoshi Jamir tenati tepela o aser tayongzükba o jembi, Imsüsöng Jamir-i ken tajung ka tena telok ayongzükba den Tournament Director T. Mulung Aier ajanga tournament tenzüktsü aser iba sentong Fazl Ali College nung Asst. Prof. Dr. Moalem Imchen ketdangsüba nung iba sentong agi.

Li Ning North East Invitational Badminton Tournament 2023 nung Women's Doubles, Men's Doubles, Men's 75+ doubles, Men's 85+ doubles, Men's 95+ doubles aser Men's 105+ asayatsü asoshi Manipur nungi 12, Assam nungi 4 aser Nagaland nungi 69 ta ajak agi takoktet asayar 85 shilem agidagi aser iba tournament January 15 nü tembangtsü aser iba tembangbuba sentong nung tetushi tejaoker Engineer in Chief, Dept. of Power, GoN Er. Moa Aier alitsü.

Chuchuyimlang nung 13 buba Marsosang football trophy asayar

Chuchuyimlang, Luchii/ December 12 (TYO): 13 buba Marsosang nüngtem asayaba football trophy Dec 12, 2023 nü yangi Langpangkong Tsükong GHS Chuchuyimlang play ground nung tenzükogo. Iba asayamung ya Divisional Forest Officer, Mokokchung, Dr. Senthula IFS-i meraketa lapoktsü.

Taküm iba asayamung nung telok 12-i shilem agitsü aser itemji Pool pezü küma lemsar asayatsü. Pool 'A' nung - Aroju Club, Wingers Club & defending champion N. Obang Memorial Football Team lir, Pool 'B' nung - Youngsters FC, Rocky Club & Team Gilgal lir, Pool 'C' nung - Visions, United Boys, Ungerlong FC aser Pool 'D' nung Telongjem FC, Endzone Elite aser Marsosang SC parnok lir.

Marsosang Football Trophy ya 1994 küm tenzük aser iba asayamung ya Rocky Club-i alitsü nungdaker. SMART tetezi tejangja asayar ka, tesazük shitak yur asayar ka, Mokokchung district nung MDFA Trophy sülenbo iba trophy ya tuluba asütsü. Iba asayamung nung Mokokchung district nungi dang masü Nagaland nung football asayar tajung aika arua shilem agitsü lir.

Taküm iba trophy shibai bendir mezüngbuba jenjang nem senpet sen 1, 50,000/- (rupees one lakh fifty thousand) aser atongdakba nem 80,000/- (rupees eight thousand) agütsütsü. Iba den semifinal tashi atonger nema tepela sayutsü. Nija senpet Best Goal Keeper, Best Defender, Best Player, Highest Scorer, Best Team ta shima senpettsütsü.

Sentong nung MDFA executive member - L. Yanger, yimsüsür Imtikumzuk (Aola Rionsanger Putu Chuchuyimlang), MFT Organizing Convener - Talitemsu parnokia shilem balala agi. Tanü asayamung tenzüka Ground 1 nung Aroju Club o Wingers Club na asayaba Aroju-i goal 2-1 agi Winger madak takok angu aser aser Ground 2 nung Youngster FC o Rocky Club na asayaba Rocky Club-i goal 14-2 agi Youngster pur akok. Iba asayamung ya tan Dec ita 16 tashi asayaa amungtsü.



Mongolbarnü Kuala Lumpur, Malaysia nung tang asaya aliba Men's Hockey Junior World Cup quarter final nung India team-i 4-3 agi Netherland kokogo.

BILEMDANGANG

"O bilemdangerang jembizüka yoktsü merangang."

Wokha District Open TT Championship tenzükogo

Dimapur, Luchii/December 12 (TYO): Wokha District Open Table Tennis Championship December 12 nü Indoor Badminton Stadium nung tenzükogo. Iba sentong nung Chief Electoral Officer (CEO) Nagaland, Vyasan R (IAS) alakteta jaoker liasü.

Asayamung lapokba sentong nung CEO Vyasan R-i, Wokha district nung saisapong sobaliba tajung aliba aser kanga jangrabangra asayaba indang lemsatepa liasü. Paisa, district nung sempet tajung aketertem aika lir saka asayartem ajungshitsü atema lokti tentettem peria

maliba ajanga nükjidong metongteter ta ashi. Taoba mapang Wokha DC alidang tajangshibatem dak ajemdaker jembiba mapang pai district tenüng nungi volleyball team tajung kati shilem agiba atema tenüng sang agütsü aser lanurtem dang item asayartem nungi angazüka district asoshi konang tetushi timba bener arutsütsü ajungshia liasü.

CEO Vyasan R-isa, lanurtem nem parnok sempet aser tasa sayutsü atema sabang tajung ka agütsütsü asoshi iba asayamung ayongzükba atema tawa tentetba Wokha District Table